

La Quotidiana 26-8-2016, p. 18

17.25 CUNTRASTS SIN SRF 1

Sgular senza cunfins?

Essas vus sgulads en vacanzas questa stad? U avais vus be laschè sgular voss paratgs? La redacziun dals Cuntrasts sgola en pliras direcziuns tras l'emprima emissiu suenter la stad: cun dronas, cun aviuns u perfin ensemen cun tschess barbets. Ellas sgolan adina pli savens e mintga uffant po cumprar in tal apparatin: ina drona. Er l'armada e la polizia sgolan regularmain cun dronas. E perquai essan nus i a guardar nua che las autoritads statalas fan atgnamain diever da quels objects sgulants e tge ch'ellas astgan in summa filmar. La redactura e pilota da hobi Paula Nay,



è sgulada questa stad cun in aviun senza motor ed ha perfin fatg intgins loopings. Ma avant ses sgol ha ella laschè montar ad in cardiolog apparaturas per mesirar las capriolas da ses cor. Nus mussain ils resultats. In accident cun in helicopter l'avust dal 1979 ha midà la vita da Jon Pünchera. Anna Serarda Campell l'ha visità ed ha scuntrà in um che n'ha betg pers la veglia da viver, malgrà tut ils numerus culps da destin. As regurdais vus anc dals emprims tschess barbets ch'eran vegnids mess en libertad avant exact 25 onns en il Parc naziunal svizzer? En il fratemp vivan passa 200 da quels utschels en las Alps. Ils dus pli frestgs èn actualmain en las Baronnie en Frantscha. Nus als havain filmà e declerain tge che quella colonia da tschess barbets ha da far cun sia parentella en Svizra.